

壬柴志藁

壬癸志稿九

太倉錢寶琛伯瑜輯

同里

葉裕仁涵溪  
季錫疇崧耘  
趙兆熊耳山  
畢庭杰雄伯

參校

人物

太倉州

隱逸

宋

胡嶧字仲連稷言子天性高邁與郡中方子通惟深林德祖處為友放散泉石間建炎登極特以年格授官得迪功郎安遠尉曰老矣承朝廷恩意可爾終不仕所居

壬癸志稿

隱逸

一

五柳園加植松竹用杜甫宅舍如荒村句名其堂曰如村稱如村老人子百能有傳

俞君登字泰卿福州長樂人早孤母黃氏親授書宋末累徵不起宋亡隱太倉自號知止翁延祐中卒門人諡曰貞節先生子焯字元明泰定四年進士仙居縣丞楊麟伯字祥甫沙溪人宋咸淳四年進士揚州觀察推官宋亡隱居不出元泰定間建義莊義學集賢院學士閻復為立碑記

元

瞿孝禎字逢祥工詩得句輒撫琴自適由崑陽徙團溪

關樂隱園與楊維禎姚文奐張羽顧瑛輩游不及聲利  
瞿信字實夫兄智字睿夫一作慧夫時稱二瞿先生智敦儒  
術歷郡縣校官藩府辟不拜信好學矜行食必男女別  
席衣冠非就寢不去兄卒撫其孤子女數輩嘗出遇張  
志道老儒寒甚盡解所衣授之至正間台寇作負母避  
地青龍海上築室曰閒野御史李烈舉孝廉不應子度  
舉茂才授池州學正亦不許應洪武初度始仕陝西金  
縣知縣

呂誠字敬夫淹通經史不撓世務所居園林嘗蓄一鶴  
復致一鶴因築來鶴亭知縣屢以師聘不就

壬癸志稿

隱逸

二

盧觀字彥達少有秀材深湛於學受業鄉先生湯彌昌  
錢重鼎之門見道分明稱義勇時公卿多欲列薦觀力  
辭家居教授終其身門人私謚曰夷孝先生子熊熙熊  
見列傳熙見宦績傳

顧權字伯衡其先蘭溪人父達卿始居太倉權幼質過  
人長工易爲文尚實言不事誇伐散意詩酒未嘗及仕  
宦與人交有禮度卒年五十門人私謚曰靖夷先生無  
子知州揭溪斯教授蔡基葬之馬鞍山北

明

王日昱居多古木有古樹王家之稱閉門不出以道義

自持人稱隱君子

盧充賴字次農熙子傳其家學制行尤篤以能書薦將官之會世父熊死非罪卽抱骸骨歸葬高隱不仕子儒有傳

周賢字思齊永樂間詔修大典以善書徵辭曰母老不能行也終以隱居卒浚儀趙永言誌其墓謂有陶宏景風時號惠齋先生

周詩字以言皇甫冲謂其文超朗其人疏曠或聞其名造之輒避去妙於方藥作內經解與虞山孫艾善卒葬吾谷

壬癸志稿

隱逸

三

劉倣字以勉智孫性耽詩酒不慕榮利晚營別圃疊山引泉蒔花植竹蕭然物外

張啓字慧叔棄儒術習韜略入都爲楊忠烈公所知以布衣上保障東南培植人心二疏不報後游山東適白蓮教反啓自募兵助勦斬馘無算撫按欲薦授以官以母老辭歸卒

周敏成字政甫萬曆四十六年舉人究心經世之務崇禎四年以奏銷註誤得譴後以兵事受知於大學士孫承宗爲遼東巡撫方一藻辟贊軍事山川阨塞瞭如指掌會所居停副將王憲刺探京師事波及敏成并逮詔

獄久之獄解參軍事如故國變後堅謝世事潛心釋典  
十餘年年七十三而卒

陳朝典字徵五以教授重鄉里學者稱温如先生遭鼎  
革同子瑚僑寓蔚村瑚操一小舟販樵鬻布往來湖村  
得錢市酒進父朝典作一二小詩好談古來高人獨行  
鄰里化之輒遣子弟就學其有小小勃谿諍語搖手面  
赤曰恐使陳先生父子知也年至七十餘卒

王璣字璿伯性孝嘗刲肱已父疾崇禎十三年武進士  
守備柘林歷任副將移駐劉陽城及大兵至璣方巡  
檄猝遇戰眾寡不敵中數矢而仆有老卒負之免時統

壬癸志稿

隱逸

四

帥奇其勇欲生致之執其父母爲招璣慟哭曰吾不能  
不爲親屈也因降署之職不受布袍草履躬耕奉親年  
四十三卒妻許氏繼妻許氏俱見列女傳

王日新字鑑明諸生教授弟子有程法明明季亂日新  
絕意科舉肆力於天文地理之學星緯形勝瞭如指掌  
甲申後韜晦遯跡躬耕於野吳偉業贈詩比之伏勝桓  
榮年五十四卒子發祥有傳

王儀字異人諸生讀書植行家壁立自守泊如當事者  
高其行或遺以金不顧居城南數椽不蔽風雨詠詩自  
娛甲申後棄儒冠放跡頭陀自號樂道人

宋龍字子猶崇明人萬歷時諸生遭亂避地太倉與陸世儀陳瑚盛敬郁法王育等十人爲友其學淹貫經史而歸於踐履篤實嘗扁舟入富春山慟哭謝臯羽祠鼎革後隱於醫僧服終其身

陸羲賓字鴻逸能詩兼精奇壬有智略陸世儀亟稱之遭亂與陳瑚避地蔚村晚築室城西顏其額曰春星草堂布素以終

袁臨字孝宜弟賁字幼白同爲諸生父嶽以諸生游京師有節概臨賁尤恃才負氣不可一世時稱二袁張溥舉復社奔走名士所不能致者二袁而已甲申後臨耕

壬癸志稿

隱逸

五

海濱嘯傲終身賁薙髮入山人稱龍蔭大師

王瀚字原達雙鳳人諸生有至性執父喪哀毀過禮甲申之變祝髮隱於浮屠徙居廬山改名戒顯字願雲能詩文工書法

郭士髦字斯士居劉河廩生甲申遘變欲自沈舍旁池水念父老不果所居毀於兵徙茜涇終身罕入城市侍父疾七年孝謹如一日年六十五卒弟澥字人一從士髦學後棄儒冠隱海濱同時張元治字在田亦以諸生放廢終其身

張于允字晉三采從子鼎革時徙崑山依鄉塾以遯跡

流離險阻孤憤之概形於詞色丙戌同友某避地唐墅  
焚劫四起僦小舟避覆水死

陶鴻祚字裔昌鎔子居直塘里少讀書不屑科舉業居  
家尊儒術斥二氏嘗悲憤時事痛哭荒江蕭寺間著英  
雄淚二十卷重編元通鑑綱目若干卷所與交者學正  
文祖堯及州人王育盛敬華乾龍袁賁陳瑚及其甥顧  
鉞數人而已

顧鉞字雅儔蘇州府諸生讀書有原委重名節素志高  
尚不苟去就喪祭多用古禮幼喪父母與季弟鎰甚相  
友愛著有勸戒錄

壬癸志稿

隱逸

六

毛雲漢字子五諸生究心三禮鼎革時與弟霄漢避兵  
璜溪亂定還城杜門不出教授生徒自給晚歲精禪學  
曾手書華嚴經藏於法輪寺霄漢亦諸生性廉靜能詩  
文

王挺字周臣時敏長子諸生與陸世儀陳瑚相師友以  
門蔭補中書科中書在官七月上疏請破格用人奉使  
兩浙卻饋遺不宿官舍不赴公宴復命卽請歸養入  
國朝閉門卻軌徵舉賢才不就晚年廢目日使家童誦  
書以聽爲文口占使書之名其稿爲不盲集卒年五十

九祀鄉賢

陸世榆字襄虞少爲諸生攻苦力學鼎革後委棄舉業  
或歌或哭人莫測也常事往物色之以臥疾辭年六十  
餘卒

陸發字濬初諸生有文行鼎革時年未壯杜門戢影水  
亭竹圃嘯詠其間嘗於危難中扶植孤寡士林義之  
周西臣字俶文性孤峭少習制舉業幽微峭厲亦能詩  
鼎革後執耒躬耕徜徉自得

壬癸志稿

隱逸

七

壬癸志稿九終

